

Ո Ր Ո Շ ՈՒ Մ

Վարչական գործի վարույթը կարճելու մասին

«27» մայիսի 2021թ.

ք. Երևան

ՀՀ պետական եկամուտների կոմիտեի իրավաբանական վարչության պետ Արման Մնացականյանս, քննելով մաքսային ձևակերպումների մասնագետ Նարեկ Սարգսյանի վերաբերյալ նյութերը,

Պ Ա Ր Զ Ե Ց Ի՝

ՀՀ ՊԵԿ հետքացթողումային հսկողության վարչության աշխատակիցները, ղեկավարվելով Եվրասիական տնտեսական միության մաքսային օրենսգրքի 332-րդ և «Մաքսային կարգավորման մասին» ՀՀ օրենքի 133-րդ հոդվածներով, իրականացրել են կամերալ մաքսային ստուգում «ՏԱՎՈՒՇ ՏԵՔՍԻԼ» ՍՊ ընկերությունում և հայտնաբերել, որ «ՏԱՎՈՒՇ ՏԵՔՍԻԼ» ՍՊ ընկերության անվամբ թվով 4 Ա/Հ-ներով հայտարարագրված «Բամբակյա մանվածք» և «Տրիկոտաժե քաթաններ, սպիտակեցրած» նկարագրությամբ ապրանքներ, որոնց ծագման երկիրը հանդիսացել է Թուրքմենստանը, ինչի հիման վրա տրվել են ապրանքների ծագման հավաստագրեր (CT-1) և կիրառվել է սակագնային առանձնաշնորհում (արտոնություն (ՅԱ))՝ մաքսատուրքի վճարումից ազատման տեսքով, այն դեպքում, երբ ապրանքների փաստացի ձեռքբերումը տեղի է ունեցել և առուվաճառքի պայմանագրերը կնքվել են մի կողմից որպես վաճառող (մատակարարող)՝ կանադական «"Vantage International Canada" Inc», արաբական «Real Tobacco Trading FZE» և «Magnetic Limited ՕԱԶ» ընկերությունների, իսկ մյուս կողմից որպես գնորդ՝ «ՏԱՎՈՒՇ ՏԵՔՍԻԼ» ՍՊԸ-ի միջև:

Իրականացված կամերալ մաքսային ստուգման արդյունքում 16.03.2021թ. կազմվել է թիվ 0012-Ա ակտը և «ՏԱՎՈՒՇ ՏԵՔՍԻԼ» ՍՊ ընկերությանն առաջարկվել է կատարել վերահայտարարագրում՝ վճարելով պակաս վճարված մաքսային վճարները: Ակտով նշվել է, որ խախտվել է «Անկախ պետությունների համագործակցությունում ապրանքների ծագման երկրի որոշման կանոնների մասին» 20.11.2009թ. համաձայնագրի 5.1 մասի «ա» կետը:

Համաձայնագրի 5.1 մասի «ա» կետի համաձայն՝ ապրանքը ներմուծման հայտարարագրման ժամանակ Համաձայնագրի մասնակից պետությունների մաքսային տարածքներում օգտվում է ազատ առևտրի ռեժիմից, եթե ապրանքն արտահանվում և/կամ ներմուծվում է Համաձայնագրի մեկ մասնակից պետության ռեզիդենտի և Համաձայնագրի մյուս մասնակից պետության ռեզիդենտի միջև կնքված պայմանագրի հիման վրա, որն արտահանվում է Համաձայնագրի մեկ մասնակից պետության մաքսային տարածքից և ներմուծվում է Համաձայնագրի մյուս մասնակից պետության մաքսային տարածք:

Կամերալ մաքսային ստուգման նյութերն ուղարկվել են ՀՀ ՊԵԿ իրավաբանական վարչություն մաքսային կանոնների խախտման հատկանիշների հարցը պարզելու համար: Այնուհետև «ՏԱՎՈՒՇ ՏԵՔՍԻԼ» ՍՊ ընկերության վերաբերյալ նյութերն ուղարկվել են ՊԵԿ հետաքննության և օպերատիվ հետախուզության վարչություն, քանի որ մաքսային մարմին ներկայացված մաքսային հայտարարագրերում ոչ ճշգրիտ տեղեկություններ նշելու հետևանքով «ՏԱՎՈՒՇ ՏԵՔՍԻԼ» ՍՊ ընկերության կողմից պակաս հաշվարկված մաքսային վճարները գերազանցել են «Նվազագույն աշխատավարձի մասին» ՀՀ օրենքի 3-րդ հոդվածով նախատեսված չորսհազարապատիկի չափը:

08.04.2021թ. կայացվել է քրեական գործի հարուցումը մերժելու մասին որոշում, որում նշվել է ՀՀ Հայաստանի Հանրապետության և Թուրքմենստանի կառավարության միջև ազատ առևտրի

մասին»» 03.10.1995թ. համաձայնագրի մասին: Նշվել է նաև, որ նշված համաձայնագրով վերոնշյալ արտոնությունները կիրառելու համար ապրանքի սեփականության իրավունքը Թուրքմենստանի ռեզիդենտ կազմակերպությանը պատկանելու պայման նախատեսված չէ:

Այնուհետև նյութերը կրկին ուղարկվել են ՀՀ ՊԵԿ իրավաբանական վարչություն մաքսային կանոնների խախտման հատկանիշների հարցը պարզելու համար

2021 թվականի ապրիլի 21-ին ՀՀ ՊԵԿ իրավաբանական վարչությունում Նարեկ Սարգսյանի նկատմամբ ՀՀ մաքսային օրենսգրքի 203-րդ հոդվածի 1-ին մասի 2-րդ պարբերության հատկանիշներով կազմվել է մաքսային կանոնների խախտման վերաբերյալ արձանագրություն, որի մեկ օրինակն ուղարկվել է նրան:

Հաշվի առնելով, որ վերոթվարկյալ միջազգային իրավական ակտերը կարգավորում են նույլ հարաբերությունները, 07.05.2021 թվականին հարցում է կատարվել ՀՀ արտաքին գործերի նախարարություն պարզելու համար, թե արդյո՞ք Թուրքմենստանը վավերացրել է 18.10.2011 թվականի «Ազատ առևտրի գոտու մասին» պայմանագիրը, թե՛ ոչ, և եթե այո, ապա «Հայաստանի Հանրապետության կառավարության և Թուրքմենստանի կառավարության միջև ազատ առևտրի մասին 1995 թվականի հոկտեմբերի 3-ին կնքված համաձայնագիրը շարունակում է գործել, թե՛ ոչ:

Նշված հարցմանն ի պատասխան հայտնվել է, որ Թուրքմենստանը չի ստորագրել «Ազատ առևտրի գոտու մասին» պայմանագիրը և այդ պայմանագրի մասնակից պետություն չէ: Միաժամանակ, Հայաստանի Հանրապետության և Թուրքմենստանի միջև գործում է 1995թ. հոկտեմբերի 3-ի «Հայաստանի Հանրապետության կառավարության և Թուրքմենստանի կառավարության միջև ազատ առևտրի մասին» համաձայնագիրը, որն ուժի մեջ է մտել 1996 թվականի հուլիսի 4-ից:

Համաձայնագրի 1-ին հոդվածի 1-ին մասի համաձայն՝ պայմանավորվող կողմերը չեն կիրառում մաքսատուրքեր, հարկեր և գանձումներ, որոնք ունեն համարժեք ներգործություն այն ապրանքների ներմուծման և արտահանման վրա, որոնք ծագում են մի պայմանավորվող կողմի մաքսային տարածքից և նախատեսված են մյուս պայմանավորվող կողմի մաքսային տարածքի համար: Համաձայնագրի 2-ին հոդվածի 1-ին պարբերության համաձայն՝ պայմանավորվող կողմերը սույն Համաձայնագրի գործողության տակ ընկնող ապրանքները ուղղակի կամ անուղղակի չեն հարկի այնպիսի ներքին հարկերով կամ գանձումներով, որոնք կգերազանցեն ներքին արտադրության կամ երրորդ երկրների ծագում ունեցող համանման ապրանքների համար նախատեսված ներքին հարկերը և գանձումները: Այսինքն՝ նշված համաձայնագրի համաձայն՝ CT-1 սերտիֆիկատի առկայության արդյունքում առաջացող արտոնությունները կիրառելու համար ապրանքի սեփականության իրավունքը Թուրքմենստանի ռեզիդենտ կազմակերպությանը պատկանելու պայման նախատեսված չէ, այսինքն՝ ապրանքը թուրքմենական ծագում ունենալու համար բավարար է միայն Թուրքմենստանում ծագած լինելու պայմանը և նախատեսված է Հայաստանի Հանրապետություն մաքսային տարածքի համար:

ՀՀ ՎԻՎ օրենսգրքի 247-րդ հոդվածի 1-ին մասի 1-ին կետի համաձայն՝ վարչական իրավախախտման վերաբերյալ գործի վարույթը չի կարող սկսվել, իսկ սկսվածը ենթակա է կարճման վարչական իրավախախտման դեպքի բացակայության դեպքում:


Այսպիսով, պարզվել է, որ «Անկախ պետությունների համագործակցությունում ապրանքների ծագման երկրի որոշման կանոնների մասին» 2009 թվականի նոյեմբերի 20-ի համաձայնագրի փոխարեն կիրառելի է 03.10.1995թ. «Հայաստանի Հանրապետության կառավարության և Թուրքմենստանի կառավարության միջև ազատ առևտրի մասին» համաձայնագիրը, որում Համաձայնագրի մեկ մասնակցի պետության ռեզիդենտի և մյուս մասնակից պետության ռեզիդենտի պահանջ նախատեսված չէ, ինչը հիմնավորվում է 26.12.2018թ. թիվ 203 և 19.02.2019թ. թիվ E-10,

15.05.2019թ. թիվ E-28, E-29 հաշիվ-ապրանքագրերով, AM97953052, AM97953053, AM97951563, AM97953287 CT-1 սերտիֆիկատներով, 11.01.2019թ. թիվ 05100030/110119/0000025, 05.03.2019թ. թիվ 05100030/050319/0000305, 24.05.2019թ. թիվ 05100030/240519/0000835 և 05.06.2019թ. թիվ 05100030/050619/0000920 ապրանքների հայտարարագրերով:
Վերոգրյալի հիման վրա և ղեկավարվելով ՎԻՎ ՀՀ օրենսգրքի 247-րդ հոդվածի 1-ին կետով, ՀՀ մաքսային օրենսգրքի 206 և 221-րդ հոդվածներով՝

ՈՐՈՇԵՑԻ՝

1. Նարեկ Սպարտակի Սարգսյանի (նույնականացման քարտի համար՝ 008292229) նկատմամբ սկսված վարչական գործի վարույթը կարճել:
2. Որոշման մասին հայտնել Ն. Սարգսյանին:

ԻՐԱՎԱԲԱՆԱԿԱՆ
ՎԱՐՉՈՒԹՅԱՆ ՊԵՏ



ԱՐՄԱՆ ՄՆԱՑԱԿԱՆՅԱՆ